


- ▶ Violénsia entre juventude
- ▶ Tua/alku liga ho konflitu
- ▶ Disputa rai
- ▶ Baku malu entre membru grupu arte marsiais.

TENDÉNSIA KONFLITU

Total Insidentes ne'ebé relata



Analiza dadus insidente tun iha Maiu-Juñu 2013, Bele hetan sumariu insidenti iha www.belun.crowdmap.com.

POLÍSIA HALO KNA'AR TUIR LEI NO ORDEN

Polísia Subdistritu Hatolia (Ermera) kaptura Lideransa grupu ho naran *FALINTIL, Forsa Timor Leste (FTL) Republika Demokratiku Timorese (RDT)*.

Iha Subdistritu Hatolia (Ermera), kooperasaun entre Polísia no comunidade lori mudansa pozitivu, nune'e iha dia 8 de Maiu 2013, Polísia Subdistritu Hatolia (Ermera) halo kapturasaun bá lideransa nain tolu (3) husi **grupu** ho naran ***FALINTIL, Forsa Timor Leste (FTL) Republika Demokratiku Timorese (RDT)***, ne'ebé durante iha Abril grupu sira halo kobransa iligal osan valor US\$ 13, hodi halo kartaun identidade hanesan membru grupu Forsa FALINTIL, FTL RDT, ne'ebé ho hanoin atu troka FALINTIL-Forças da Defesa de Timor-Leste (F-FDTL), ne'ebé konsagra ona iha Konstituisaun RDTL artigu 146. Bainhira Polísia halo kapturasaun, lori kedas lideransa nain tolu ne'e bá sela Polísia durante oras 72, hafoin halo investigasaun. Durante lideransa nain tolu (3) ne'e iha sela, hetan visita ofisiál husi lideransa veteranus distritu Ermera señor Dudu. Entretantu, comunidade Subdistritu Hatolia (Ermera) sente seguru, tanba laiha ona movimentu husi grupu ***FALINTIL, Forsa Timor Leste (FTL) Republika Demokratiku Timorese (RDT)***.

Polísia Subdistritu Hatolia (Ermera) kaptura elementu grupu arte marsiais

Kna'ar Polísia mak atu proteje lei no orden hodi asegura comunidade. Kna'ar ne'e hatudu duni husi asaun konkreta hanesan Iha fulan Juñu, akontese iha aldeia Fatubolu, Suku Fatubolu, Subdistritu Hatolia (Ermera), Polísia halo kapturasaun ba elementus grupu PSHT hamutuk ema nain 50 ne'ebé mak halao hela aktividade treinu iha oras 09-10 pm lori bá detein iha sela Polísia Gleno hodi halo investigasaun hafoin haruka fila bá uma, no lorloron tenke halo apresentasaun iha estasaun Polísia.

Parte seluk, Polísia mós uza asaun violénsia hodi implementa lei no orden, bainhira membru ruma hatais atributu arte marsiais iha fatin públiku, hanesan relata Iha dia 18 de Juñu 2013, Aldeia Dosmagar, Suku Urahou, Subdistritu Hatolia (Ermera), oknum Polísia Task Force nainrua, wainhira halao patroliá bá iha merkadu, hare joven mane nain rua hatais hela farda PSHT hodi lao bá mai iha merkadu laran. Iha tempu hanesan Polísia halo asaun baku joven mane nain rua ne'e no lori bá estasaun Polísia distritu hodi presta deklarasaun, hafoin husik fali.

ASUNTU NE'EBÉ PRESIZA ATENSAUN

Baku malu entre membru grupu arte marsiais balu

Asaun violénsia entre membru grupu arte marsiais balu Iha Maiu – Juñu iha insidente (3). Husi insidente sira ne'e, rezulta mane ida hetan kanek todan iha kanotak tanba sona ho tudikiha Aldeia Ramelau, Suku Bairo Pite, Subdistritu Dom Aleixo (Dili). Impaktu seluk membru grupu arte marsiais balu nia uma hetan estraga iha Aldeia Natutu, Suku Maumeta, Subditritu Bazartete (Likísa) no Suku Bairo Pite, Subdistritu Dom Aleixo (Dili), nune'e mós comunidade nia uma balu hetan estraga iha Aldeia Mane Mesak, Suku Bairo Pite (Dili).

Violénsia entre juventude ho metódu lori tudik

Rezultadu monitorizaun liga ho involvimentu juventude iha insidente periodu Maiu – Juñu (12-7). Husi insidente sira Iha Maiu, relata insidente (1) ho metódu violénsia lori tudik ne'ebé akontese iha Aldeia Darenau, Suku Nahareka, Subdistritu Ossu (Vikeke), fó impaktu mane nain rua, ida hetan hetan kanek todan iha matan no ida kanek iha kelen, tanba deit mane nain rua ne'ebé hetan kanek la fó fila telefone ne'ebé impresta. Akontese mós iha Subdistritu Alas (Manufahi), joven mane ida lori tudik sona mane nain rua hetan kanek todan.

Akontese mós impaktu husi metódu violénsia seluk iha Maiu, mane ida ain tohar iha Subditrtu

REVISTA SITUASAUN MAIU – JUÑU 2013

Alas (Manufahi). Iha Subdistritu Metinaro (Dili) mane ida kanek iha inus, nune'e mós iha Subdistritu Nain Feto relata mane ida kanek iha ibun.

Impaktu konsumu tua manas, joven mane ida mate tanba sona ho rama husi nia kolega

Relata insidente liga ho konsumu tua manas durante Maiu-Juñu (7-6). Husi insidente sira ne'e, insidente ida (1) Iha dia 3 de Juñu 2013, Aldeia Aimutin, Suku Comoro, Sudistritu Dom Aleixo, (Dili) joven mane ida lori rama ambon sona mate nia kolega joven mane ida ne'ebé sira hemu tua hamutuk, ho motivu problema privadu. Insidente ne'e hetan resposta husi Xefe Suku no Polísia kontinua halo prosesu investigasaun.

Disputa rai

Rezultadu monitorizaun Belun, relata insidente Maiu-Juñu (4-3). Husi insidente sira ne'e insidente ida, feto makautor nu'udar prepetador ne'ebé akontese Iha dia 12/05/2013, Aldeia Lama Klaran, Suku Carau-balo, Subdistritu Vikeke, feto ida ho katana ba asalta no ta'a didin uma família ida nian at hotu, tanba família refere halo fali uma iha rai feto ne'e nian sein kuiñesementu. Insidente ne'e rezistu ona iha Polísia. Insidente seluk mane mak sai hanesan prepetador.

Dun malu buan

Iha fulan Maiu relata insidente (2), liga ho família balu bainhira oan moras, sein evidencia no ho intepretasaun katak tanba ema buan mak halo, hanesan akontese iha Aldeia Rae-Soro, Suku Leo-Lima, Subdistritu Hatudo (Ainaru), mane nain rua baku lisuk mane ida rezulta kanek iha oin, tanba família ida nia oan mate dun mane refere buan, mak halo mate. Insidente ne'e rasik, mane ne'ebé hetan baku hato'o ona keixa ba Polísia, no Polísia bolu parte rua hodi rezolve, maibé mane ne'ebé hetan baku hakarak kontinua prosesu ba tribunal. Entretantu Iha Aldeia Lebu Lugor, Suku Goglear, Subdistriu Maubara, (Likísa), mane nain tolu ba asalta mane nain ida iha uma tanba dehan mane ne'e buan. Insidente ne'e hetan atusaun husi lideransa lokal, hodi rezolve tuir kultura, maske parte rua la simu malu.

Periodu Maiu – Juñu, akontese mós insidente seluk liga ho:

Baku malu entre estudante, relata iha Distritu Dili (2) no Covalima (1). Insidente sira resposta husi serbisu hamutuk entre Polísia, lideransa komunitaria no representante husi Ministeriu Eduksaun.

Polísia iha violénsia, Iha dia 20 de Maiu 2013, Aldeia Frekat, Suku Bairo Pite, Subdisstritu Dom Aleixo (Dili), joven mane ida ho kondisaun lanu provoka membru Polísia ida dehan mai ita baku malu, nune'e membru Polísia ne'e telefone ba nia komandante to'o kedas fatin akontesementu, hodi duni joven ne'e no baku kedas. Maske nune'e insidente ne'e hetan resposta husi Polísia maluk.

Asaun violénsia husi ema deskuñesidu, akontese iha Distritu Baucau (1), Ermera (3), Dili (1), no Vikeke (1). Insidente iha Vikeke señoira ida mak sai hanesan vitima iha Aldeia kanlor, Suku Luka, Subdistritu Vikeke, grupu mane balu asalta no baku señoira ida ho motor iha dalan, bainhira señoira ne'e husi suku Bibileo atu ba nia uma iha Suku Luka. Insidente ne'e rezistu ona iha Polísia.

Akontese mós krime seluk periodu Maiu – Juñu (16-6) inklui iha Distritu Likísia (3), Manufahi (1), Oecusse (3), Manatutu (5), Dili (2), Covalima (2), Lautem (4), Ainaru (1), Ermera (1).

RESPOSTA BA KONFLITU

Atividade iha Nível Nasionál

Atividade ne'ebé mak hala'o husi Belun iha fulan Maiu no Juñu 2013 mak hanesan; Iha fulan Maiu 2013 Belun hala'o treinamentu Transformasaun Konfliktu ba membru Konselu Juventude iha distritu Ermera, Manatuto, Aileu, Baucau no Likísia. Programa AtRes halao workshop Monitoring ba Eleisaun Parlamentu Foinsa'e (PFN) nian ba monitor Belun nian. Programa ne'e hala'o tanba hetan kooperasaun serbisu hamutuk entre SEJD, UNICEF ho Belun no CNJTL.

Atividade ne'ebé halao iha nível Komunitária Iha fulan Maiu no Juñu 2013, iha fulan Maiu programa AtRes hala'o treinamentu Transformasaun Konfliktu ba Rede Prevensaun no Reponde Konfliktu iha subdistritu Laulara. No fulan Juñu konsultasaun regulamentu Tara Bandu no sosializasaun estabelesimentu munisipiu no lei kontra violénsia domestika iha subdistritu Fatuberlihu. distritu lima hanesan; Ermera, Likísia, Aileu, Baucau no Manatuto. Programa DAME hala'o asesmentu ba rede RPRK iha distritu sanulu resin ida ekluui distritu Dili no Oecusse halo hotu iha fulan Jullu no Agustu. Programa Rezolusaun Mediasaun no Disputa (RMD) fasilita mediasuan ba disputa rai iha distritu Dili iha fulan Juñu ba comunidade disputante sira. Maibé parte rua disputa la hetan solusaun no sira hakarak submete sira ninia kazu ne'e ba iha tribunal atu hetan justisa.



Belun Fasilita Mediasaun ba disputante disputa rai iha distritu Dili

Iha fulan Maiu mós atividade Tara Bandu hala’o husi RPRK Laga atu proteje meu ambiente hetan prezensa husi Sekretáriu Estadu Meiu Ambiente, Representante Sosiedade sivil, representante Polísia no F-FDTL inklui móa Belun.



Tara Bandu iha subdistritu Laga distritu Baucau

REKOMENDASAUN

Sekretáriu Estadu Juventude no Desportu

- Kontenua estabesele sentru ba foin sa’e sira, ne’ebe iha rekursus ba matenek tekniku atu bele iha konhesementu no prepara ba futuru hodi bele hetan serbisu.

Ministériu Komersiu Industria no Ambiente

- Haforsa lei no regulamentu ba taxa importansaun hodi responsabel ba lisensa fan alkol/tua,

Sekretáriu Estadu Terras e Propriedades

- Presiza halao sosializasaun kona ba Lei rai nian ba comunidade sira, hodi nune’e comunidade sira bele hatene diak no senti nain ba lei rai.

Sekretáriu Estadu Seguransa / Polísia Nasionál Timor Leste

- Profesionáliza tan kbiit Polisia Intelijente atu bele deskobre grupu armadu ilegal no grupu deskoñesidu sira iha Timor Leste atu bele kria estabilidade Nasionál no hamenus sentimentu pániku iha comunidade
- Kontenua dezenvolve kapasidade profesonáliza ba PNTL sira atu bele profesionál iha atendimentu ba insidente ruma ho respeita no eleva mos aspeitu direitu umanu.

Sosiedade Sivil

- Hala’o edukasaun sívika ba comunidade no hanesan:
 - Alkol liga ho violênsia: Hasae koehesementu ne’ebe bele sai impaktu husi alkol hanesan fizika no saúde mental, hodi halo promosaun ba responsabilidade ba modera comsumu alko.
 - Disputa rai: Soailiza lae rai no fo koragen ba comunidade hodi hanoin ba dezenvolve alternativu la ho violênsia ho tipu resolusaun disputa.
- Kontenua halo advokasia ba Governu kona ba isu Juventude, Alkol/Tua no isu seluk tan ne’ebé relaciona ho konteuidu revista situasaun ne’e.

KONA-BÁ REVISTA SITUASAUN NE’E

Revista situasaun ne’e relata kona-bá asuntu xáve relaciona ho insidente violênsia no tendensia husi koleksaun dadus monitorizasaun liu husi Sistema Atensaun no Responde Sedu Timor-Leste durante Maiu – Juñu 2013. Belun esforsu atu fahe informasaun ne’ebé up-to-date no serteza. Hanoin katak situasaun bele hetan mudansa ho lalais, ami agradese no simu informasaun seluk ne’ebé bele klarifika ka update dadus ne’ebé ami iha liu husi AtReS. Favor email AtReS nia Program Manager Bylah Da Costa: bylah.belun@gmail.com.